



ATASSUT

UPA 2016/18

Steen Lyngé

15.04.2016

Uunga siunnersuut: Nioqqutissanik eqqussuinermit akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xXx 2016-imeersoq (Erngup puiaasamiittup imigassallu koffeinimik akullit akitsuutaat)

(Aningaasaqarnermut Aatsitassanullu Naalakkersuisoq)

Naalakkersuisut siunnersuutaat imaqarpoq ukioq kingullermi akitsuutit pillugit Inatsisartut Inatsisaattut nr. 21 nov. 23-Anni 2015-imeersutut akuerisaq. Inatsimmi pineqartumi atuutilernissamut ullorititaasup allanngortinnissaanik siunnersuut imaqarpoq. Tassani ullorititaasup Augustip 20-ianit 2015-imiit novemberip 24-ianut allanngortinnianeqarluni.

Siunnersuutip aammattaaq imaraa imernut eqqussuuttakkanut aammalu energidrik-isut taaneqartartunut akitsuutissat nutaat.

Naalakkersuisut Inatsisip qulaani taaneqartup atuutilernissaanut ullorititaasup allanngortinnissaanut pisariaqartinneranut tunngavigaat, paasineqarmat akitsuutit atuutilersinneqartut niivitarfinnik mikinerusunik ersitatigut annaasaqaatigisimammassuk.

Akitsuutit ulloq siusinnerusukkat atuutilersinneqarnerat tunngavigalugu niivitarfiit annaasaqarsimanerannik kinguneqarsimavoq, tamannalu pinngitsoortinnissaannut niivertarfiit sillimanissaminnut periarfissaqarsimangillat.

Atassut-mit ajuusaarluta maluginiarparput, Naalakkersuisut akitsuutit pillugit siunnersuummik august-imi 2015-imi suliaqarnermini, akitsuutit pillugit siunnersuutini suliaqartarnermi periuseq nalinginnaasoq atorsimangikkaat.

Akitsuutit pillugit siunnersuutini suliaqarnermi suleriuseq nalinginnaasoq atorneqartartoq tassaasarpog, siunnersuut saqqummiunneqartarluni aammalu suliarineqartarluni ullup ataatsip iluani. Taamatut suleriuseqarnerup akitsuutit atuutilinnginneri katersipallassinnaanerit pinngitsoortinniartartussaammagit.

Periuseq nalinginnaasoq atornagu, Naalakkersuisunit siunnersuummik tunniussinermi ulloq Inatsisip atuutilerfissaa Inatsisartut ukiaanerani ataatsimiinnissaa taamatullu suliarinnissinnaanerit sioqqullugu ullulerneqarsimalluni.

Taamatut suleriutsimik nalinginnaanngitsumik periuseqarsimanerup paatsungatitsinermik kinguneqarsimanagera isertuutissanngilarput. Tamassumalu kingunerisimavaa inatsisitit ullormik kingumoortumik atuutsitsiffeqartumik imaqartut aaliangiunneqarsimaneri.

Atassut-mit Naalakkersuisut kaammattussavagut, siunissami akitsuutinut siunnersuutit periutsit

nalinginnaasut saqqummiussinermi malittaqqullugit. Taamaaliornikkummi pinngitsoortinneqassamat, inatsisinik kingumut atuutilersussanik aaliangiisarnissaq.

Siunnersuummi eqqortumik periusissaq tassaavoq Inatsisit pineqartut kingumut atuutilersimanerat allangortinneqassasoq, taamaalilluni atuutilerfissaa tassaassasoq 24. November 2015.

Akitsuutit nutaat pineqartut pillugit Atassut-mit ima oqaaseqassaagut.

Siullermik taanngitsoorusunngilarput, misissuinerit takutittaannarmassuk imeq angerlarsimaffinni kuuginnartoq imermit puujaasaniittunit peqqinnarnerummat. Akitsuusiiniarnermi anguniarneqarpat inuit peqqinnerulernissaat aammalu avatangiisinik mingutsitsineq annikinnerulernissaa, taava akitsuusiinerit illersorneqarsinnaapput.

Taamatut oqareerluta, saneqqussinnaanngilarput piviusuummat nunatsinni sumiiffinni arlaqartuni imeq kuuginnartoq ilaatigut bakterissanik akoqartarmat piffissap ilaani.

Tamannalu tunngaveqarpoq imeqarfiit tasiummata piffissani assigiinngitsuni avataangiisinit mingutsinneqartartut.

Taamaalisoqartillugu innuttaasut imermik atuiniarunik imermik qalaaqqaarnissamik innersuunneqartarlutik.

Tassungalu atatillugu innuttaasut ikinngitsut imermik pisiassanik pisiortulersarput.

Taamaammat Atassut-mit isumaqarpugut, imernik pisiassanik tikisitaasunik akitsuusiiniarneq tunngaviummik tunuarsimaarfigineqartariaqartoq.

Nunatta nammineq imermik tunisassiorsinnaanera siuarsarusullugu akitsuusiinerit aqqutigineqassappata Atassut-mit paasisinnaassagatsigu.

Energidrik-inik taaneqartartut pillugit annertuumik atuinerup peqqinnanngitsuuneranik ernumassuteqarneq Atassut-mit paasisinnaavarput, ingammik inuusuttut meeqqallu pineqartillugit. Energidrik-inik annertuumik atuineq peqqissutsimut ulorianarsinnaammat.

Peqqissutsimut suliniaqatigiiffik WHO tunisassianut annertuumik atorneqarnerminnut peqqissutsimullu ulorianarsinnaasunut pinaveersaartitsinissamat iliuusissanik assigiinngitsunik siunnersuuteqartarpoq. Pinaveersaartitsinermut iliuusissatut ilaatigut akitsuutit aqputaalluarsinnaanerat aamma siunnersuutiminut ilaatittarpaat.

Energidrik-inik akitsuusiiniarneq WHO-p siunnersuutaasa ilaannut assigulluinnarpoq, taamaammat Atassut-mit energidrik-inik akitsuusiiniarnermut siunnersuut tapersernartipparput.

Atassut akitsuutinut tunngaviummik akerliusuuvoq, taamaammat Naalakkersuisut kaammattussavagut - aningaasaqarnermut isertitassanik pisariaqartitsineq annertunerusoq ilisimaarigunikkut - allaffissornikkut

pisariillisaanerit aammalu sipaarniarnerit aqutigeqqullugit. Akitsuutit nutaat pilersinnaaveersaarnissaat anguniarneqartariaqarmat.

Taamatut oqaaseqarluta siunnersuut Atassut-mit ataatsimiitsitaliamut ingerlaqqinnissaa kissaatigaarput.